



**KEMENTERIAN PERTANIAN DAN INDUSTRI MAKANAN**

***Ministry of Agriculture and Food Industries***

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : [www.mafi.gov.my](http://www.mafi.gov.my)

---

## **SIARAN MEDIA**

### **DIALOG INDUSTRI AGROMAKANAN 2022**

#### **PERKUKUH JAMINAN SEKURITI MAKANAN NEGARA**

**PUTRAJAYA, 10 FEBRUARI 2022** – Kementerian Pertanian dan Industri Makanan (MAFI) terus komited memperkukuhkan agenda Sekuriti Makanan Negara dengan mengadakan program Sesi Dialog Industri Agromakanan 2022.

Dialog yang bertemakan “Pemodenan dan Produktiviti Menjamin Sekuriti Makanan” diadakan bertujuan untuk mengenal pasti isu sektor agromakanan khususnya aspek sekuriti makanan dan mengambil langkah intervensi yang sesuai mengikut perkembangan semasa, menyeluruh serta holistik dalam usaha memperkasa sektor agromakanan negara.

Selain itu, tema ini dilihat selaras dengan penekanan yang diberikan melalui pelaksanaan Dasar Agromakanan Negara (DAN) 2.0 (2021-2030) yang antara lainnya memberi penekanan terhadap pemodenan sektor pertanian yang mampan, berdaya tahan dan berteknologi tinggi.

Seramai 200 orang peserta secara fizikal dan 1,000 orang secara *Webinar / Facebook Live* telah hadir dan menyertai program dialog ini yang terdiri daripada kalangan pemain-pemain industri sektor agromakanan merangkumi subsektor padi, tanaman, ternakan, perikanan dan keseluruhan rantaian agromakanan meliputi persatuan-persatuan dan pemain industri yang terlibat di sepanjang rantaian nilai sektor agromakanan seperti wakil pengeluar, syarikat peneraju, pengimport-pengimport dan pengeksport, serta wakil-wakil industri yang aktif terlibat dalam rangkaian pemasaran dan pemprosesan.

Selain daripada pemain industri sektor agromakanan, sesi dialog ini turut melibatkan penglibatan daripada jabatan dan agensi di bawah MAFI serta jemputan daripada kementerian, jabatan dan agensi lain yang berkepentingan dalam sektor agromakanan.

'Dialog Industri Agromakanan 2022 ini merupakan salah satu inisiatif MAFI, platform komunikasi 2 hala secara terus bersama pemain industri selaras dengan pendekatan *whole of government* dan *whole of society* untuk berkongsi idea, pandangan, cadangan dan hala tuju kerajaan selain mengeratkan kerjasama dan hubungan baik untuk MAFI terus memperkasa sistem penyampaian perkhidmatan yang terbaik kepada rakyat seiring dengan keperluan semasa khususnya melalui golongan sasaran seperti petani, penternak dan nelayan serta semua pemain industri di sepanjang rantai nilai,' kata Dr Ronald.

'Selain itu, inisiatif Dialog ini mampu mengenalpasti isu-isu sektor agromakanan khususnya aspek sekuriti makanan sebelum langkah intervensi yang sesuai diambil mengikut perkembangan semasa, menyeluruh serta holistik dalam usaha untuk terus memperkasa sektor agromakanan serta menjamin sekuriti makanan,' kata Dr Ronald.

Menurut Dr Ronald, meninjau prestasi satu (1) dekad yang lalu, sektor agromakanan terus mengekalkan daya tahan, dan sumbangannya kepada Keluaran Dalam Negeri Kasar (KDNK) terus meningkat daripada RM26.6 bilion pada tahun 2010 kepada RM51.3 bilion pada tahun 2020.

'Namun begitu, bagi memenuhi keperluan penduduk, negara pada hakikatnya masih perlu bergantung kepada import beberapa komoditi makanan utama seperti beras, sayur dan daging untuk memastikan bekalan sentiasa mencukupi pada setiap masa,' jelas beliau.

Tambah Dr Ronald lagi, kita turut menghadapi cabaran perubahan iklim yang akan menjejaskan kemampuan sumber asli untuk aktiviti pertanian. Justeru, tahap penerimgunaan teknologi dan automasi dalam kalangan pengusaha perlu ditingkatkan, dilengkapi dengan pelaburan swasta serta penyelidikan, pembangunan, pengkomersialan dan inovasi untuk memacu pertumbuhan sektor agromakanan.

Untuk rekod, sesi libat urus awal dengan pemain industri telah diadakan bagi mengenalpasti isu-isu utama setiap subsektor dan cadangan penyelesaiannya. Di antara isu yang dibangkitkan adalah berkaitan subsidi / insentif, *Smart* Sawah Berskala Besar (*Smart* SBB), pengurusan tanaman padi, pendekatan teknologi *Integrated Pest Management*, pembangunan industri sarang burung walit, pembangunan industri hiliran, pengurusan buruh asing, pensijilan, tenaga buruh, lesen, kru asing, pengimportan, tanah Lesen Pendudukan Sementara (TOL), pemasaran dan kenaikan harga input, makanan dan peralatan.

Pandemik COVID-19 dan bencana banjir telah menguji daya tahan sistem makanan negara dalam mengatasi kejutan ekonomi dan ketidakpastian. Aktiviti pengeluaran makanan juga tidak dapat dilaksanakan secara optimum akibat daripada kekangan masa dan tenaga kerja yang mengakibatkan kerugian besar. Kesan limpahan terhadap keseluruhan rangkaian sistem makanan dan sekuriti makanan negara sehingga menyaksikan banyak norma baharu terpaksa dilaksanakan dan pendekatan-pendekatan baharu diperlukan bagi memastikan kelancaran rangkaian bekalan makanan sepanjang masa.

Program Sesi Dialog ini dihadiri YB Datuk Seri Dr. Ronald Kiandee, Menteri Pertanian dan Industri Makanan (MAFI) selaku panel sesi dialog. Turut serta sebagai panel dialog adalah YB Datuk Seri Hj Ahmad bin Hamzah, Timbalan Menteri I MAFI, YB Datuk Dr. Nik Muhammad Zawawi bin Haji Salleh, Timbalan Menteri II MAFI dan YBhg. Dato' Haslina binti Abdul Hamid, Ketua Setiausaha MAFI.

**KEMENTERIAN PERTANIAN DAN INDUSTRI MAKANAN**  
**10 FEBRUARI 2022**

## **FACT SHEET**

### **PROGRAM SESI DIALOG INDUSTRI AGROMAKANAN 2022, BERSAMA YB MENTERI PERTANIAN DAN INDUSTRI MAKANAN, KEMENTERIAN PERTANIAN DAN INDUSTRI MAKANAN (MAFI)**

#### **DEWAN SERBAGUNA KEMENTERIAN PERTANIAN DAN INDUSTRI MAKANAN (MAFI) 10 FEBRUARI 2022**

1. Sektor pertanian dan industri makanan telah memainkan peranan yang sangat penting dalam menjana ekonomi serta meningkatkan kualiti dan jaminan sekuriti makanan negara. Sebagai peneraju dalam sektor pertanian, MAFI berperanan mentransformasikan sektor pertanian ke arah yang lebih moden, dinamik dan kompetitif.
2. Menerusi Dasar Agromakanan Negara (2021-2030) (DAN 2.0), MAFI meneruskan pembangunan sektor agromakanan yang menyasarkan sektor yang mampan, berdaya tahan dan berteknologi tinggi. Adalah diharapkan agar DAN 2.0 menjadi inspirasi dan faktor dorongan kepada pihak swasta dan pemain industri untuk bersama-sama dengan Kerajaan bagi menerajui pembangunan sektor agromakanan sebagai sektor yang berdaya saing dan moden, seterusnya memastikan kejayaannya.
3. Dalam usaha MAFI mencapai matlamat yang disasarkan, kerjasama yang erat dengan pemain-pemain industri dalam sektor agromakanan harus dilaksanakan bagi mencapai hasrat yang telah ditetapkan oleh pihak kerajaan. Permasalahan serta keperluan para pemain industri perlu diberikan perhatian dalam menambah baik sistem penyampaian kerajaan sedia ada. Justeru, sesi Dialog Industri Agromakanan 2022 dengan tema “Pemodenan dan Produktiviti Menjamin Sekuriti Makanan” diadakan bagi mengenal pasti isu sektor agromakanan khususnya aspek sekuriti makanan dan mengambil langkah intervensi yang sesuai mengikut perkembangan semasa, menyeluruh serta holistik dalam usaha memperkasa sektor agromakanan negara.

4. Program ini mensasarkan seramai 200 orang peserta secara fizikal dan 1,000 orang secara *Webinar/Facebook Live* terdiri daripada kalangan pemain-pemain industri sektor agromakanan merangkumi subsektor padi, tanaman, ternakan, perikanan dan keseluruhan rangkaian agromakanan meliputi persatuan-persatuan dan pemain industri yang terlibat di sepanjang rangkaian nilai sektor agromakanan seperti wakil pengeluar, syarikat peneraju, pengimport-pengimport dan pengeksport, serta wakil-wakil industri yang aktif terlibat dalam rangkaian pemasaran dan pemprosesan. Selain daripada pemain industri sektor agromakanan, sesi dialog ini turut melibatkan penglibatan daripada jabatan dan agensi di bawah MAFI serta jemputan daripada kementerian, jabatan dan agensi lain yang berkepentingan dalam sektor agromakanan
  
5. MAFI berharap, menerusi Program ini, aspirasi harapan dan amanat Kerajaan/MAFI disampaikan kepada pemain industri terlibat agar dapat menjayakan/menyokong pemodenan dan produktiviti Sekuriti Makanan demi Keluarga Malaysia.